

4. aðalfundur Félags grunnskólakennara
13.-14. mars 2008

Tillögur um breytingar á lögum FG

LÖG
fyrir

FÉLAG GRUNNSKÓLAKENNARA

Nafn

1. gr.

Félagið heitir Félag grunnskólakennara og á aðild að Kennarasambandi Íslands. Félagssvæðið er allt landið. Heimili þess og varnarþing er í Reykjavík.

Hlutverk

2. gr.

Hlutverk félagsins er að:

- Fara með málefni félagsmanna Kennarasambands Íslands sem sinna kennslu eða ráðgjöf í grunnskólum eða vinna við stofnanir og fyrirtæki sem tengjast kennslu- og fræðslumálum,
- vera málsvari félagsmanna,
- gera kjarasamninga fyrir félagið,
- halda fundi og námskeið fyrir trúnaðarmenn,
- sjá um kjör fulltrúa á þing Kennarasambands Íslands,
- efla faglega umræðu meðal félagsmanna,
- vinna að því að enginn starfi við kennslu í grunnskóla án kennsluréttinda.

Aðild

3. gr.

Allir sem starfa við kennslu eða ráðgjöf í grunnskólum og eru félagsmenn í Kennarasambandi Íslands eða vinna við stofnanir og fyrirtæki sem tengjast kennslu- og fræðslumálum og Félag grunnskólakennara semur fyrir, skv. lögum nr. 94/1986 eða samkomulagi við viðkomandi launagreiðanda, eru félagar í Félagi grunnskólakennara.

Svæðafélög

4. gr.

Félag grunnskólakennara starfar á eftirtöldum stöðum og svæðum:

- Reykjavík
- Vesturlandi
- Vestfjörðum
- Norðurlandi vestra
- Norðurlandi eystra
- Austurlandi

- Suðurlandi
- Vestmannaeyjum
- Reykjanesi sunnan Kópavogs
- Kópavogi, Mosfellsbæ, Seltjarnarnesi og Kjósarhreppi

Hlutverk svæðafélaga er að vera málsvari félagsmanna hvert á sínu svæði og halda trúnaðarmannanámskeið, félagsfundi og haustþing í samráði við stjórn Félags grunnskólakennara. Ennfremur, í samráði við stjórn Félags grunnskólakennara, að annast kjör fulltrúa á þing Kennarasambands Íslands. Hvert svæðafélag er tengiliður smærri eininga sem starfa vilja í sérstökum félögum innan svæðisins t.d. m.t.t. launagreiðanda. Svæðafélög setja sér lög í samræmi við lög Félags grunnskólakennara og Kennarasambands Íslands.

Svæðafélögum er heimilt að sameinast enda sé það gert í samráði við stjórn FG. Til að tvö eða fleiri svæðafélög geti sameinast þarf að samþykkja það á löglega boðuðum aðalfundum þeirra félaga sem í hlut eiga. Gæta þarf að því að öllum lögformlegum reglum sé fylgt við sameiningu félaga. Við sameiningu skulu fjármunir þeir sem félögin hafa fengið haldast óbreyttir, utan þess að stjórnunarkostnaður fellur niður hjá öllum félögum en hið nýja félag fær stjórnunarkostnað eins og önnur félög. Mismunurinn fer í sameiginlega úthlutun til félaganna og verður skipt milli allra félaganna skv. fjölda félaga. Stjórn FG og svæðaformenn ákveða sameiginlega úthlutunarreglur fjár til svæðafélaga á samráðsfundum.

Félagsmenn í einstökum sveitarfélögum sem hafa sama launagreiðanda geta myndað formlegt eða óformlegt kennarafélag.

Aðalfundur

5. gr.

Aðalfundur Félags grunnskólakennara skal haldinn þriðja hvert ár innan 6 mánaða frá þingi Kennarasambands Íslands. Aðalfundur hefur æðsta vald í málum félagsins, sbr. þó 19. gr. Á aðalfundi eiga sæti með atkvæðisrétti stjórn, formenn svæðafélaga, samninganefnd, skólamálanefnd auk formanns skólamálanefndar og einn fulltrúi fyrir hverja 50 félagsmenn hvers svæðafélags eða brot úr þeirri tölu sem umfram kann að vera. Kjörtímabil þeirra er milli reglulegra aðalfunda félagsins. Stjórnir svæðafélaga annast kosningu aðalfundarfulltrúa sinna í samræmi við lög FG/KÍ og ber að tilkynna nöfn þeirra til stjórnar félagsins minnst 8 vikum fyrir aðalfund. Einnig skal tilkynna jafnmarga varamenn. Til aðalfundar skal boðað með almennu fundarboði a.m.k. 16 vikna fyrirvara. Aðalfundarfulltrúar skulu boðaðir sérstaklega með a.m.k. 6 vikna fyrirvara. Tillögur til umfjöllunar á aðalfundi þurfa að berast stjórn félagsins eigi síðar en 6 vikum fyrir aðalfund, sbr. þó 20. gr. Aðalfundargögn skulu send út með minnst 4 vikna fyrirvara.

Dagskrá aðalfundar

6. gr.

1. Skýrsla stjórnar
2. Ársreikningar félagsins
3. Nefndastörf og tillögur, mál og nefndaálit sem borist hafa tekin til umræðu
4. Lagabreytingar
5. Fjárhagsáætlun

6. Kosning nýrrar stjórnar
7. Kosning stjórnarmanna í Kennarasambandi Íslands
8. Kosning tveggja skoðunarmanna reikninga og eins til vara
9. Kosning fulltrúa í samninganefnd
10. Kosning skólamálanefndar
11. Kosning uppstillingarnefndar og í aðrar trúnaðarstöður sem aðalfundur ákveður
12. Önnur mál
13. Stjórnarskipti

Kosning fulltrúa á aðalfund FG og þing Kennarasambands Íslands

7. gr.

Stjórn félagsins á fjögurra kosta vól við kjör fulltrúa á þing Kennarasambandsins:

1. Á fundi (kjörfundi) sem boðaður er með minnst 10 daga fyrirvara. Heimilt er að hafa fleiri en einn kjörfund eða kjördeildir í félaginu.
2. Í bréflægri kosningu og fá félagsmenn þá senda kjörseðla. Þegar þeir hafa kosið senda þeir kjörseðilinn til stjórnar/kjörstjórnar félagsins eða afhenda trúnaðarmanni innan tilskilins tíma.
3. Samkvæmt tillögu félagsstjórnar eða einstakra félagsmanna. Séu aðeins jafnmargir í kjöri og kjósa á er sjálfkjörið.
4. Rafræna kosningu samkvæmt reglum sem stjórn FG setur.

Ársfundur

8. gr.

Þau ár, sem ekki er haldinn aðalfundur skal stjórn félagsins boða til ársfundar þar sem m.a. er fjallað um starfsemi félagsins og starfsáætlun auk þess sem reikningar þess eru lagðir fram. Rétt til setu á ársfundi hafa stjórn og varastjórn, formenn svæðafélaga, skólamálanefnd, samninganefnd og formenn annarra fastanefnda. Stjórn félagsins hefur umboð til að kalla til fleiri fulltrúa ef þurfa þykir.

Almennir félagsfundir

9. gr.

Stjórn Félags grunnskólakennara getur boðað til almennra félagsfunda. Skytt er að boða til almenns fundar ef 10% eða fleiri krefjast þess skriflega og tilgreina fundarefni.

Stjórn

10. gr.

Stjórn félagsins skipa 7 menn og fimm til vara, formaður, varaformaður, ritari, gjaldkeri og meðstjórnendur. Kjörtímabil stjórnar er þrjú ár. Stjórn og varamenn eru kjörnir á aðalfundi félagsins. Formaður er kosinn sérstaklega í bréflægri/rafrænni allsherjaratkvæðagreiðslu og skal það fara fram eigi síðar en 6 vikum fyrir aðalfund, en aðrir stjórnarmenn saman á aðalfundi og skipta þeir síðan með sér verkum. Stjórnin heldur stjórnarfundi svo oft sem þurfa þykir.

Hlutverk stjórnar

11. gr.

Stjórn félagsins fer með æðsta vald í málefnum félagsins milli aðalfunda. Formaður ber ábyrgð á allri starfsemi félagsins og hefur yfirumsjón með rekstri þess. Varaformaður er staðgengill formanns.

Samráðsfundur

12. gr.

Stjórn félagsins skal boða til fundar með formönnum svæðafélaga a.m.k. tvisvar á ári. Samráðsfundur er stjórn til ráðuneytis um stjórnun félagsins.

Um gjörðarbækur

13. gr.

Ritari félagsins heldur gjörðarbækur og fundargerðir skulu samþykktar á stjórnarfundi og undirritaðar af ritara og formanni.

Fjárreiður og bókhald

14. gr.

Þing Kennarasambands Íslands ákveður skiptingu félagsgjalda. Gjaldkeri félagsins hefur umsjón með fjárreiðum þess og bókfærslu og leggur fram endurskoðaða reikninga á aðalfundi. Auk þess skal hann gefa stjórn og ársfundi yfirlit yfir stöðu félagsins minnst einu sinni á ári.

Kosning til stjórnar Kennarasambands Íslands

15. gr.

Formaður félagsins situr í stjórn Kennarasambands Íslands en varaformaður er staðgengill hans í forföllum. Auk þess skal kjósa einn fulltrúa í stjórn Kennarasambands Íslands séu félagsmenn fleiri en 600, tvo séu þeir fleiri en 1800 og þrjá séu þeir fleiri en 5400. Stjórnarmenn Kennarasambands Íslands skal kjósa á aðalfundi félagsins og jafnmarga til vara, sbr. þetta ákvæði.

Samninganefnd

16. gr.

Á aðalfundi félagsins skal kjósa fimm fulltrúa og fimm til vara, sem ásamt stjórn félagsins, mynda samninganefnd og fer hún með gerð kjarasamninga fyrir félagsmenn, sbr. lög nr. 94/1986 um kjarasamninga opinberra starfsmanna. Samninganefndin skiptir með sér verkum.

Hlutverk samninganefndar er:

- Að ganga frá endanlegri kröfugerð,
- að annast gerð kjarasamninga,
- að taka ákvörðun um hvort efna skuli til atkvæðagreiðslu um verkfall,
- að taka ákvörðun um hvort undirrita eigi kjarasamning með fyrirvara um samþykki félagsmanna og um hvort fresta skuli verkfalli.

Samninganefnd hefur samráð við fagfélög félagsmanna og svæðaformennvið undirbúning kröfugerðar og kallar eftir atvikum á fulltrúa þeirra til ráðgjafar við samningagerðina.

Formaður félagsins í umboði Kennarasambands Íslands ber ábyrgð á undirritun kjarasamninga fyrir félagsmenn og gerð og undirritun viðræðuáætlana vegna endurnýjunar þeirra.

Formaður og / eða varaformaður Kennarasambands Íslands starfa með samninganefndinni eftir nánari ákvörðun stjórnar félagsins hverju sinni

Skólamálanefnd

17. gr.

Starfandi skal vera sjö manna skólamálanefnd sem sinnir faglegum málefnum fyrir félagsmenn. Aðalfundur kýs sex fulltrúa og fimm til vara en stjórn Félags grunnskólakennara skipar formann.

Hlutverk skólamálanefndar er:

- Að fjalla um fagleg málefni og skólamál í samráði við stjórn félagsins og skólamálaráð,
- að vinna að eflingu kennaramenntunar og endurmenntunar félagsmanna,
- að annast tengsl við fagfélög og sambærilegar nefndir annarra uppeldisstétta.

Kjörnefnd

18. gr.

Á aðalfundi félagsins skal kjósa þriggja manna kjörnefnd og þrjá til vara. Þeir 3 sem flest atkvæði hljóta verða aðalmenn, og þeir 3 sem næstir koma í atkvæðamagni varamenn í þeirri röð sem atkvæðafjöldi þeirra segir til um.

Hlutverk kjörnefndar er að auglýsa eftir frambjóðendum til trúnaðarstarfa fyrir félagið minnst 12 vikum fyrir aðalfund. Hafi ekki nægilega mörg framboð borist 8 vikum fyrir aðalfund, skal hún leggja fram tillögur um frambjóðendur til þeirra starfa sem ekki hafa borist framboð í. Tryggja skal framboð til formanns, annarra stjórnarmanna, fulltrúa í stjórn Kennarasambandsins, skoðunarmanna reikninga, fulltrúa í samninganefnd, skólamálefnd, kjörnefnd og til annarra trúnaðarstarfa sem aðalfundur kýs til. Áður en nefndin leggur fram tillögur um frambjóðendur sem hún hefur leitað til, skal liggja fyrir samþykki viðkomandi einstaklinga. Formaður er kosinn sérstaklega í bréflægri/rafrænni allsherjaratkvæðagreiðslu minnst 6 vikum fyrir aðalfund og annast kjörnefnd framkvæmd kosningarinnar

Við uppstillingu í trúnaðarstörf á vegum félagsins skal leitast við að tryggja jafnræði.

Auglýsingar um framboð til trúnaðarstarfa skal senda stjórnnum svæðafélaga, trúnaðarmönnum og til þeirra félagsmanna sem hafa virkt netfang í félagaskrá KÍ. Trúnaðarmönnum ber skylda til að kynna þau með auglýsingum til félagsmanna sinna í viðkomandi skólum. Auglýsingar skulu liggja frammi í a.m.k. 3 vikur, áður en framboðsfrestur rennur út. Jafnframt skal auglýsa eftir tillögum í félagsblaði og á heimasíðu FG og KÍ.

Ekki er heimilt að gefa kost á sér til trúnaðarstarfa fyrir Félagið eftir að framboðsfresti lýkur, þ.e. 8 vikum fyrir aðalfund. Undantekning frá þessu er, ef aðili sem þegar hefur gefið kost á sér, hlýtur ekki kosningu á aðalfundi, þá getur viðkomandi boðið sig fram til annarra starfa sem þá á eftir að kjósa í. Ef aðili dregur framboð sitt til

baka, eða forfallast eftir að framboðsfresti lýkur ber uppstillinganefnd að tryggja að nýtt hframboð berist.

Kjörnefnd setur sér nánari starfsreglur sem staðfestar skulu af stjórn félagsins.

Allsherjaratkvæðagreiðsla um kjarasamninga, boðun verkfalls o.fl.

19. gr.

Um kjarasamninga og boðun verkfalls skal fara fram leynileg, skrifleg allsherjaratkvæðagreiðsla meðal félagsmanna, skv. lögum nr. 94/1986 um kjarasamninga opinberra starfsmanna. Kjörskrá skal miða við félagatal í þeim mánuði sem atkvæðagreiðsla fer fram. Stjórn félagsins getur efnt til allsherjaratkvæðagreiðslu um önnur mikilvæg málefni sem eigi falla sérstaklega undir aðalfund.

Lagabreytingar

20. gr.

Lögum þessum má breyta á aðalfundi félagsins enda hafi breytingarnar verið kynntar í fundarboði. Tillögur um lagabreytingar þurfa að hafa borist stjórn átta vikum fyrir aðalfund og skulu þær kynntar aðalfundarfulltrúum eigi síðar en þrem vikum fyrir aðalfund. Til þess að breyting nái fram að ganga verður hún að hljóta samþykki 2/3 hluta greiddra atkvæða. Breytingar á lögum koma fyrst til framkvæmda er stjórn Kennarasambands Íslands hefur staðfest þær.

Gildistaka

21. gr.

Lög þessi öðlast gildi þegar stjórn Kennarasambands Íslands hefur staðfest þau.

Samþykkt á 4. aðalfundi Félags grunnskólakennara 14. mars 2008.